

फिलिप्पीइ च्वंगु मण्डलीयात पावलं च्वःगु पौ म्हसीका

थ्व पौ पावलं थःमहं यूरोपय् दक्वसिबय् न्हापां स्वना थकूगु रोमी साम्राज्यया माकेडोनियाया मण्डलीयात च्वःगु खः। पावलं थ्व पौ थःत इयालखानाय् कुनातःबलय् च्वःगु खः। अबलय् गुलि गुलि विश्वासीतय्सं वयात मभिकाः खँ ल्हानाच्वंगु व फिलिप्पीइ च्वंगु मण्डलीइ फताहा गुस्तय्सं वयाः मखुगु मखुगु खँ स्यनाः दुःख बियाच्वंगु खः। थथे दुःखकष्ट फयेमाःसां पावलं येशू ख्रीष्टयात क्वात्तुक विश्वास यानाः लय्ताया च्वनेमाःगु खँ न्ह्यथनातःगु दु।

पावलं थ्व पौ फिलिप्पीइ च्वंपिं विश्वासीतय्सं थःत माःबलय् ग्वाहालि छ्वयाहःगुलि इमित सुभाय् बियाः च्वयातःगु खः। पावलं थःत व इमित दुःखकष्ट जूसां साहस व भरोसा कायेमाः धकाः अतीं बियातःगु दु। थ्व पौलय् थःगु जक भिं स्वयाः तःधंछुना मजुसे ख्रीष्ट थें क्वमिलु जुइमाः धयागु खँ नं न्ह्यथनातःगु दु। थ्व न्हगु जीवन व्यवस्था मानय् यानाः दुगु मखु, बरु ख्रीष्टलिसे छप्पं जूगुलि परमेश्वरं बियादीगु वरदान खः धकाः नं ध्वाथुइकातःगु दु। थुकी परमेश्वरं ख्रीष्टलिसे छप्पं जुइपिन्त बियादीगु आनन्द व शान्तियागु खँ नं न्ह्यथनातःगु दु।

थ्व पौलय् विश्वासीतय्गु चालचलनय् खनेदयेमाःगु खँ, गथे लय्ताया जुइगु, भरोसा तयेगु, मिलय् जुइगु व सह यानाजुइगु खँय् नं बःबियातःगु दु। थ्व पौलय् फिलिप्पीइ च्वंगु मण्डलीइ च्वंपिन्त पावलं तसकं माया याः धकाः सी दु।

धलः पौ

न्ह्यखँ १:१-११

पावलयागु जुयाच्वंगु खँ १:१२-२६

ख्रीष्टयात विश्वास यानाः म्वायेगु १:२७-२:१८

तिमोथी व इपाफ्रोडिटसया बारे पावलया ग्वसाः २:१९-३०

ख्याच्वः व होश यायेगु खँ ३:१-४:९

भेटी ब्युपिन्त सुभाय् ब्युगु ४:१०-२०

क्वचाय्कूगु ४:२१-२३

फिलिप्पी

पावलपाखें ज्वजलपा

1 ख्रीष्ट येशूया च्यःत पावल व तिमोथीयापाखें फिलिप्पीइ च्वंपिं ख्रीष्ट येशूयात विश्वास यानाच्चंपिं, मण्डलीइ हेरचाह याइपिं व ग्वाहालि याइपिं सकसितं ज्वजलपा!✧

2 इी परमेश्वर बाः व प्रभु येशू ख्रीष्टपाखें छिमित दया माया व शान्ति दयाचवनेमा।

पावलायागु प्रार्थना व सुभाय्

3 छिमिगु लुमान्तिइ जिं परमेश्वरयात न्ह्याबलें सुभाय् बियाचवनागु दु।

4 छिमिगु निंति जिं न्ह्याबलें लयलयतातां प्रार्थना यानाचवनागु दु।

5 छाय्धाःसा भिंगु खँ न्यंकेगु ज्याय् छिमिसं जितः न्हापांनिसें ग्वाहालि यानावयाचवंगु दु।

6 छिमिगु नुगलय् भिंगु ज्या शूरु यानादीम्हयसिनं हे येशू ख्रीष्ट झायादीबलय् तकं फुक्क ज्या सिधय्कादी धयागु जितः विश्वास दु।

7 छिमित जिं थःगु नुगलय् तया तयागु दु। छिमिगु खँय् जिं थुकथं मतिइ तयागु पायछि हे जू, छाय्धाःसा छिमिसं जितः थथे कुनातःबलय् नं अले मतःबलय् नं भिंगु खँ न्यंकेत व थुकियागु पंलिनाः साक्षी बीगुलिइ नं ग्वाहालि याःगु दु।

8 ख्रीष्ट येशू थें जिं छिमित दुनुगलंनिसें माया यानाचवनागु दु। थ्व खँ परमेश्वरं स्यू।

9 छिमिगु माया अज्जं अप्वयावनेमा, अले छिमिसं धात्थेंगु भिंगु खँ छु खः धयागु दुनुगलंनिसें ध्वाथुइके फयेमा धकाः नं जिं प्रार्थना यानाचवनागु दु।

10 थथे जूसा जक छिमिसं भिंगु भिंगु खँयात ल्यया काये फइ। अले ख्रीष्ट झाइबलय् छिपिं शूद्रपिं व दोष मदुपिं जुइ फइ।

11 अले परमेश्वरया महिमा व प्रशंसाया निंति येशू ख्रीष्टपाखें वइगु धार्मिकताया फलं छिपिं जाइ।

म्वायेगु हे ख्रीष्ट खः।

12 यःपिं दाजुकिजापिं, जितः थथे जूवःगु दुःखकष्टं भिंगु खँ झन बय्बय् जुयावंगु दु धकाः सीकिं।

13 लायकुलिइ च्वंपिं सिपाइंतयसं जक मखु, मेपिं फुक्कसिनं नं जितः ख्रीष्टयागु निंति इयालखानाय् कुनातःगु खः धकाः सी धुंकल।✧

14 थुलि जक मखु, जितः थथे कुनातःगुलि यक्व हे दाजुकिजापिन्सं प्रभुयाके भरोसा तयाः छप्ति हे मग्यासे परमेश्वरयागु वचन न्यंकाजूगु दु।

15 गुम्ह गुम्हयसिनं ला जिं यानागु स्वये मफयाः नुगः मुइकाः व इखं नं अथे ख्रीष्टयागु खँ न्यंकाजूगु दु। गुलिसिनं धाःसा यचुगु नुगलं हे न्यंकाच्वंगु दु।

16 थथे यचुगु नुगलं भिंगु खँ न्यंका जूपिन्सं जितः भिंगु खँयागु निति थथे इयालखानाय कुनातःगु खः धकाः सीकाः माया वनाः न्यंकाजूगु खः।

17 मेपिन्सं धाःसा जि कुंका तःमहयसित अज्ज अप्वः दुःख सास्ती यायेमा धकाः मभिंगु मतिइ तयाः ख्रीष्टयागु खँ न्यंकाजूगु खः।

18 थथे न्ह्यामहयसिनं न्ह्यागुकथं न्यंका जूसां जि लयताः, छायाःसा भिंगु मतिइ तयाः याःसां मभिंगु मतिइ तयाः याःसां ख्रीष्टयागु हे खँ न्यनावनी।

19 धात्थे हे जि लयताः, छायाःसा छिमिगु प्रार्थना व ख्रीष्ट येशू बियादीगु आत्मायागु ग्वाहालि जितः त्वःतकी धकाः जिं स्यु।

20 अयजूगुलि जि छुकी नं लज्या चाये माली मखु धकाः जितः आशा व भरोसा दु। अले न्ह्याबलें थें जि आः नं ग्याये मखु, सीसां म्वाःसां जिगुपाखें ख्रीष्टयागु नां जक तःधना च्वंसां जितः गाः।

21 छायाःसा जि म्वानाच्वनेगु हे ख्रीष्टया निति खः, अले सीसां जिगु हे भिं जुइ।

22 म्वानाच्वन धाःसा जिं अज्जं ख्रीष्टयागु भिंगु ज्या याये फइ। उकिं सीगु बांलाः ला कि म्वायेगु बांलाः धकाः जिं धाये मफु।

23 जि ला बाम्हय कानाच्वंगु दु। थ्व संसार त्वःताः ख्रीष्टनाप च्वंवेनेगु जिगु तःधंगु इच्छा खः।

24 थ्व जिगु निति तसकं भिंगु खँ खः, छिमिगु निति धाःसा जि म्वानाच्वने हे माः।

25 छिपिनाप च्वने दइतिनि धकाः जितः विश्वास दु। अले छिमित विश्वासय बल्लाकेत व अज्ज लयतायकेत जि छिपिनाप च्वने दइतिनि धकाः नं जिं स्यु।

26 जि छिमिथाय् हाकनं वयेबलय् जि वःगुलि छिमिसं ख्रीष्ट येशूयात अज्ज अप्वः तःधंकी।

27 ख्रीष्टयागु भिंगु खँ न्यंक् थें छिमिगु चालचलन नं जुइमाः। छिमित नाप लाःसां, मलाःसां छिपि फुक्कं छप्पें व छगू हे मन जुयाः भिंगु खँय् विश्वास यानाच्वंगु दु धयागु जक न्यने दःसां जितः गाः।

28 दुःख बीपि खनाः छिपि ग्याये मते। थुकिं इपि नाश जुयावनी, अले छिमित मुक्ति दइ धकाः बांलाक सी दु, छायाःसा थ्व परमेश्वरं हे यानादीगु खः।

29 ख्रीष्टयात विश्वास यानाच्चनेत जक मखु, वय्कःया नितिं छिमिसं दुःखकष्ट नं सीमाः धकाः वय्कलं थथे यानादीगु खः।

30 छिमिसं न्हापा खंगु व आः न्यनाच्चंगु जिगु दुःखकष्ट छिमिसं नं फयाच्चंगु दु।☆

2

ख्रीष्ट येशू थें क्वमिलु जु

1 ख्रीष्टयात विश्वास यानाः छिमित साहस वःगु दु ला? वय्कःयागु मायां छिमित तिबः ब्यूगु दु ला? छिमिसं पवित्र आत्मां धाःथें याना जुयागु दु ला? छिमिसं थःथवय् दया माया याना जुयागु दु ला?

2 अथे खः धयागु जूसा छिमिसं छगू हे मनं, छगू हे मायां, छगू हे नुगलं, अले छता हे खँय मन बियाः जितः अज्जं लयतायकी।

3 थःगु जक भिं स्वयाः तःधंछना जुइ मते। बरु थःथवय् क्वमिलु जुयाः मेपिं स्वयाः चिधं जुया जु।

4 थःगु जक बिचाः याये मते, मेपिनिगु नं बिचाः या।

5 ख्रीष्ट येशूयाके दुगु थें ज्याःगु मन छिमिके नं दयेमाः।

6 ख्रीष्ट येशू परमेश्वर हे जुयाः नं
वय्कलं थःत परमेश्वर
भाःपिया मदी।

7 थःयसें फुक्कं त्वःताः दास थें
जुयादिल,
अले झीपिं थें
मनू जन्म कयादिल।

8 वय्कलं मनू जुयाः
सीत तकं नं लिचिलामदी।
कूसय् सिनादीबलय् तकं
वय्कः क्वमिलु जुयाः
आज्ञा मानय् यानादिल।

9 अय्जूगुलि परमेश्वरं

वय्कःयात फुक्क स्वयाः नं
तःधंकादिल,
अले दक्वसिबय् तःधंगु नां नं
छुनादिल।

10 थुकथं स्वर्गय् च्वंपि,
पृथ्वीइ च्वंपि
व पातालय् च्वंपि
फुक्कसिनं वय्कःया नामय्
पुलि चुइमाः।

11 अले परमेश्वर बाःयात तःधकेत
फुक्कसिनं येशू ख्रीष्ट हे “प्रभु” खः धकाः
थः नाला कायेमाः।☆

संसारय् थीगु जः

12 यःपि दाजुकिजापि, जि छिपिनाप दुबलय् छिमिसं जिगु फुक्क खँ न्यना का।
अथे हे जि मदइबलय् नं इन छिमिसं जिगु खँ न्यनेमाः। अले भय कयाः मुक्तिया
ज्या क्वचाय्केत मेहनत या।

13 परमेश्वर झीनापं ज्या यानादी। बांलाःगु इच्छां ज्या याकादीम्ह परमेश्वर हे
खः।

14 न्ह्यागुं ज्या उसि मचासे व जवाःसवाः मयासें यायेमाः।

15 उकि छिपिं दोष मदुपि व स्वजापिं जुयाः पापी व मभिंगु मनूतयगु पुचलय् छुं
हे ख्वं मदय्क परमेश्वरया मस्त जुयाच्वँ। नगुतयसं आकाशय् झल्ल थीक् थें छिपिं
नं इमिगु पुचलय् थिना च्वँ।☆

16 छिमिसं इमित परमेश्वरयागु जीवन बीगु वचन न्यंकाजुल धाःसा येशू ख्रीष्ट
झाइबलय् थःम्हं यानागु ज्या सिति मवन धकाः जिं छयं धस्वाके फइ।

17 छिमिगु विश्वासयागु बलिदान व सेवाय् थःगु हि तकं हाय्के माःसां जि
लयताः। अले जि छिपिनापं लयताये।

18 अथे हे छिपिं नं जि थें लयताया च्वँ।

तिमोथी व इपाफ्रोडिटस

19 तिमोथीयात छिमिथाय् याकनं हे छवयाहये फइ धकाः जिं प्रभु येशूयाके आशा
यानाच्वनागु दु। अले छिमिगु भिंगु खँ न्यने दयाः जितः लयतावइ।

20 तिमोथीं थें छिमिगु च्यूता: कयाजुइपिं मेपिं सुं हे मदु।

21 येशू ख्रीष्टयागु च्यूता: हे मतसे मेपिं फुक्कं थथःगु स्वार्थया ज्याय् जक जुयाच्चंगु दु।

22 तिमोथी गज्याःम्ह मनू खः धकाः ला छिमिसं सि हे स्यू। छम्ह कायनं थः बौनाप ज्या याये थें वं जि नाप भिंगु खँ न्यंकाजुल।

23 जितः छु छु जुइ स्वये, अले थ्व खँ सी दयेवं हे जिं वयात छिमिथाय् छवयाहये।

24 जि थः हे नं याकनं वये दइ धकाः प्रभुयाके भरोसा तयाच्चवनागु दु।

25 जितः ग्वाहालि याके छवयाहःम्ह किजा इपाफ्रोडिटसयात छिमिथाय् हे लिछवया हयेमाः थें जिं ताय्का। जिपिं निम्हयसिनं नं नाप ज्या याना, अले भिंगु खँ न्यकेगु ज्याय् नं जिपिनापं हे जुया।

26 वं छिमिगु ख्वाः स्वयेमास्ति वयकाच्चंगु दु, छायाधाःसा छिमिसं व म्हंमफुगु खँ न्यंगुलि व छिमिथाय् वयेत तसकं आयल्लुया च्वंगु दु।

27 व धात्थें हे सी थें च्वंक म्हंमफुगु खः। अयनं परमेश्वरं वयात दया यानादिल। वयात जक मखु, वय्कलं जितः नं दया यानादिल। मखुसा ला जितः दुःखय् हानं मेगु दुःख जू वइगु खः।

28 अयजूगुलि वयात हाकनं स्वयेदयाः छिपिं लयतायेमा धकाः जिं वयात छवया हयेत्यनागु खः। अले जिगु दुःखकष्ट नं क्वलाना वनी।

29 अयजूगुलि वयात थः हे किजा भाःपियाः दुनुगलंनिसें लसकुस या। थज्याःपिन्त ला हने हे माः।

30 ख्रीष्टयागु ज्याया नितिं जितः ग्वाहालि बीत वं थःगु ज्यान तकं पात। छिमिसं जिगु नितिं पूवके मफुगु ज्या वं पूवंकल।

3

धात्थें धर्मी ठहरय् जुइगु

1 यःपिं दाजुकिजापिं, मू खँ छु धाःसा – छिपिं प्रभुलिसे लयताया च्वँ। न्हापा च्वये धुनागु हे खँ हानं लिसा कयाः च्वयेत जिं थाकु मचाया। थुकिं छिमित हे भिं याइ।

2 खिचात थें ल्वाना जुइपिं, मभिंगु ज्या यानाजुइपिं व मुक्ति कायेत म्हय् चिं तयेमाः धाइपिं लिसे होश याना जु।

3 धातथेंगु चिं तइपिं ला झीपिं खः, छायाधाःसा झीसं परमेश्वरयात पवित्र आत्मां सेवा यानाच्चवना। येशू ख्रीष्टयाके भरोसा तयाच्चवना, अले शरीरयागु ज्याखँय् झीसं भरोसा मतया।

4 शरीरयागु ज्याखँय् हे भरोसा तयेगु खःसां जिं दकलय् अप्वः भरोसा तये फु।

5 बुयाः च्यान्हु दुखुन्हु हे जितः मह्य् चिं तयकूगु खः। जिं बूसांनिसें हे इस्माएली खः, अज्ज ला बेन्यामीन कुलयाम्ह हिब्रू खः। धर्मयागु खँय् हे नं व्यवस्था मानय् याइम्ह फरिसी खः।*

6 धर्मयागु ज्याखँय् नं जिं विश्वासीतयत दुःखकष्ट बीगुलिइ न्ह्यज्याना चवनाम्ह खः। अले हानं जिं यहदीतयगु थितिकुति मानय् यानाः धर्मीं जुया चवनाम्ह नं खः।*

7 जिं अबलय् थःत फाइदा दुगु धकाः तायकाच्चवनागु फुक्कं येशू ख्रीष्टयागु नितिं ज्यालगय् मजूगु धकाः तायका।

8 थुलि जक मखु, ख्रीष्ट येशू जिम्ह प्रभुयात म्हसीकेगु हे तःधंगु खँ खः धकाः थुइकाः जिं मेगु फुक्कं ज्यालगय् मजू धकाः तायका। वयकःयागु हे नितिं जिं फुक्कं त्वःता, अले वयकःयात लुइके फयेमा धकाः जिं अज्याःगु फुक्कं ज्यालगय् मजू धकाः तायकागु दु।

9 व्यवस्थां धाःथें यानाजुयागुलि जिं धर्मीं ठहरय् जूगु मखु बरु येशू ख्रीष्टयात विश्वास यानागुलि परमेश्वरं हे जितः धर्मीं ठहरय् यानादीगु खः।

10 आः ला जिं ख्रीष्टयात म्हसीकेगु, वयकः हानं म्वाना वइगु शक्तियात सीकेगु व वयकलं थें दुःखकष्ट सियाः वयकः थें जुयाः सिनावनेगु हे जक मनंतुनागु दु।

11 जिं सिनाः हानं म्वाना वइतिनि धकाः जिं आशा यानागु दु।

निशाना स्वयाः ब्वाँय् वनेगु

12 जिं फुक्कं काये धुन अले जिं सिद्ध जुइ धुन धकाः जिं धायेत्यनागु मखु। थ्व हे सिरपाः कायेत जिं कुतः यानाच्चवनागु खः। थुकिया नितिं ख्रीष्ट येशू जितः न्हापा हे थः मनू यानादी धुंकल।

13 यःपिं दाजुकिजापिं, थ्व फुक्कं काये धुन धकाः मखु। अयनं जिं छता ज्या याये — न्हापायागु खँ फुक्कं त्वःमंकाः न्ह्याःने स्वयाः वनेत कुतः याये।

14 परमेश्वरं येशू ख्रीष्टपाखें सःताः बीत तयादीगु स्वर्गया सिरपाः कायेत जिं निशानापाखे ब्वाँय् वने।

15 झीपिं बांलाक स्यूपिन्सं थथे मतिइ तयेमाः। छिपिं मध्ये सुयां हुं खँय् बिचाः पात धाःसा परमेश्वरं छिमित थ्व नं क्यनादी।

* 3:5 ३:५ प्रे २३:६; २६:५; रोम ११:११ * 3:6 ३:६ प्रे ८:३; २२:४; २६:१-११

16 थन तक झीपिं गुकथं थ्यंकः वया उकथं हे न्ह्यज्याये।

17 यःपिं दाजुकिजापिं, छिमिसं नं जिं थें या। गथे जिपिं छिमिगु नितिं नमूना जुया, अथे याइपिं मेपिनिगुपाखें नं स्यना का।✧

18 जिं छिमित न्हापा नं तःकः मछि धायेधुन। आः नं मिखाय् ख्वबि तयाः जिं धयाच्चवना – ख्रीष्टयागु कूसया शत्रु जुयाच्चंपिं नं यक्व हे दु।

19 थज्याःपिं मनूत नाश जुयावनी। छायाधाःसा प्वाः हे थुमिगु घः खः, लज्या चायेमाःगु खँय् नं थुमिसं घमण्ड याना जुइ। अले थुमिसं थ्व संसारयागु ज्याखँय् जक मन तया जुइ।

20 झीपिं ला स्वर्गाया नागरिकत खः। झीपिं मुक्ति बीम्ह झी प्रभु येशू ख्रीष्ट स्वर्ग झाइतिनि धकाः लँ स्वया च्वनापिं खः।

21 वयकलं फुक्कयात थःगु ल्हातय कयादी फु। थ्व हे शक्तिं वयकलं झीगु थ्व बमलाःगु व सिनावनीगु म्हयात वयकःयागु थें सिना मवनीगु यानादी।

4

मेगु अतीं ब्यगू

1 अयज्गुलि यःपिं दाजुकिजापिं, थुकथं हे प्रभुयात क्वातुक विश्वास याना च्वँ। जि छिमित नापलायेत आयब्रयाच्चवनागु दु। छिपिं जिगु लयूताः व श्रीपेच खः।

2 इयोदिया व सुन्तुखेयात जिं बिन्ति यानाच्चवना – छिपिं निम्ह तताकेहँ प्रभुयात विश्वास यानाः मिलय् जुयाच्चँ।

3 अले विश्वास याये बहःम्ह पासा, थुपिं मिसातयूत ग्वाहालि या। छायाधाःसा इमिसं जि नाप भिगु खँ न्यकेगु ज्या याःगु दु। थुलि जक मख, इमिसं क्लेमेस व जि नाप ज्या याःपिं जीवनयागु सफलइ नां दुथ्याःपिं मेमेपिं मनूतलिसे नं भिगु खँ न्यंकूगु दु।

4 प्रभुयाके न्ह्याबलें लयूताया च्वँ। जिं हानं धाये – “लयूताया च्वँ।”

5 फुक्कलिसे बांलाक हनाबना याना च्वँ। प्रभु याकनं झाइ।

6 छुं खँय् नं पीर काये मते। छिमित माःगु खँ प्रार्थना यानाः सुभाय् बियाः परमेश्वरयात बिन्ति या।

7 सुयागुं ज्ञान बुद्धिं थुइके मफुगु परमेश्वरयागु शान्तिं छिमिगु नुगः व मनयात ख्रीष्ट येशूपारखें बचय् याना तइ।

8 यःपिं दाञ्जुकिजापि, दकलय् लिपा जिं धाये – छिमिसं सत्यगु, हनेबहःगु, भिंगु, श्दुगु, बांलाःगु, ततःधंगु व प्रशंसा याये बहःगु खँय् जक मन बिया च्वँ।

9 जिं यानागु छिमिसं न्यनातःगु व थः नालाकया तःगु हे दु। अले जिं छिमित स्यना बियागु व थुइका बियागु नं दु। छिमिसं नं अथे हे याना च्वँ। अले शान्ति बियादीम्ह परमेश्वर छिपिनाप दइ।

भेटी ब्यूपिन्त सुभाय् ब्युगु

10 प्रभुलिसे जि तसकं लयतायाच्चनागु दु। तःन्हू लिपा छिमिसं जितः हानं लुमंकाः हल। अथे ला छिमिसं न्हापांनिसें लुमंकाच्चंगु खः। ई जक चू मलाःगु खः।

11 मदयकं मगानाः ला जिं थथे धयागु मखु, छायाधाःसा न्हायागु हे जूसां लुधंका च्वनेत स्यना कयागु दु।

12 मदुबलय् नं दुबलय् नं जि लुधंकाच्चने सः। न्हाबलें न्हायाथासं नये खंसां मखंसां, यक्व दुसां द हे मदुसा नं जि लुधंकाच्चने सय्कागु दु।

13 जितः शक्ति बियादीम्ह ख्रीष्टयापाखें जिं न्हायागुं याये फु।

14 अयनं जितः थथे दुःख जुयाच्चंबलय् छिमिसं ग्वाहालि याःगु बां हे लात।

15 थ्व खँ छिमिसं सि हे स्यू माकेडोनियां भिंगु खँ न्यंकाः वने त्यनाबलय् नं छिमिगु मण्डलीं हे जक जितः ग्वाहालि यात, मेगु गुगुं नं मण्डलीं मयाः।

16 थेसलोनिकेय् दुबलय् नं छिमिसं जितः तःकः मछि ग्वाहालि छ्वयाहल।✠✠

17 जिं छिमिपाखें ग्वाहालि कायेत थथे धयागु मखु। बरू स्वर्गाय् च्वंगु छिमिगु हे ल्याःचालय् यक्व दयावयेमा धकाः खः।

18 छिमिगुपाखें जितः मतिइ तयागु स्वयाः अप्वः हे दत। छिमिसं इपाफ्रोडिटसयात बीके छ्वयाहःगु ग्वाहालि नं जिगु ल्हातय लात। छिमिसं छ्वयाहःगु थ्व ग्वाहालि ला नस्वाः वःगु व परमेश्वरयात यःगु बलिदान थें खः।✠

19 जिमि परमेश्वरं छिमिगु मगाःमचाः स्वयादी। ख्रीष्ट येशूयाके दुगु वयकःयागु गुबलें मसुइगु धुकुतिं छिमित माःगु बियादी।

20 झी परमेश्वर बाः न्हाबलें तःधना च्वनेमा। आमेन।

लिपांगु ज्वजलपा

21 फुक्क विश्वासीतयत् जिं न्यनाहःगु दु धकाः धयाब्बु। जि नाप थन दुपि दाजुकिजापिन्सं नं छिमित न्यनाहःगु दु।

22 थनच्च्वंपि फुक्क विश्वासीतयसं नं छिमित ज्वजलपा धयाहःगु दु। खास यानाः कैसरया जहानपिनिपाखें ज्वजलपा धयाहःगु दु।

23 येशू ख्रीष्टयागु दया माया छिपिं फुक्कसित दया हे च्वनेमा।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7